

LOVANGE
DE FEV MONSIEVR
LE MARQUIS
DE CLANLEV,
TVE' A CHARANTON,
EN COMBATTANT POVR
LE SERVICE DV ROY,
ET DV PARLEMENT.

Dulce, & decorum est pro patriâ mori.



A PARIS,
Chez CLAUDE HVOT, rue saint Iacques,
proche les Iacobins, au pied de Biche.

M. DC. XLIX.

LOVANGE

DE FEV MONSIEVR

LE MARQUIS

DE CLANILEV.

TVE A CHARANTON.

EN COMBATTANT POUR

LE SERVICE DV ROY.

ET DV PARLEMENT.

Dolce, & decorum est pro patria mori.



A PARIS,

Chez CLAUDE HVOT, aux Jaius Jaques,
proche les Jacobins, au pied de Biche.

M. DC. XLIX.



LOVANGE DE FEV MONSIEVR

Le Marquis de Clanleu, tué à Charanton,
en combattant pour le seruice du Roy,
& du Parlement.

Dulce, & decorum est pro patriâ mori,



'Est vne verité qui n'auoit pas besoin de l'authorité de l'Escripture Sainte, & que le sens commun enseigne à tous les raisonnables, qu'un Amy ne scauroit donner à l'autre de plus fortes marques de son amitié, qu'en donnant sa vie pour luy. La vie est le fondement de tous les biens, & de tous les plaisirs, c'est le sujet de tous nos travaux, la cause de tous nos delices, & de toutes nos esperances. Ceux-là mesmes qui la prodiguent si franchement dans les combats, ne cherchent la mort que pour y trouver vne vie encores plus longue que celle qu'ils abandonnent. Dans le reste des bien-faits, la gratitude peut trouver non seulement la proportion, mais encores aller au delà, nous pouuons rendre l'argent qu'on nous a presté, & mesme avec vsure, nous pouuons donner des diamans pour des rubis, & des chasteaux pour des cabanes, mais nous ne pouuons iamais nous acquitter par vne iuste compensation enuers ceux qui ont employé leur vie pour nous, puis que n'estant plus en estat de receuoir la nostre, il nous seroit impossible de leur rendre autant qu'il nous ont donné. Que faut-il donc faire pour estre reconnoissans enuers les personnes qui sont mortes pour nos interests? Ne faut-il pas cherir tendrement leur memoire, & tout ce qui leur appar-

A ij

4

tenoit, reuerer leurs cendres, iusques à imiter cette sage
princesse, & fidelle femme, qui auala celles de son mary, &
leur fit vn tombeau de son estomach.

Ne faut-il pas en suite éterniser leur gloire par nos loian-
ges, & ne leur pouuant plus rendre la vie qu'ils ont perduë
pour nous, ny donner vilement la nostre, leur donner cel-
le de l'honneur qu'ils ont si ardamment desirée, & pour la-
quelle ils sont morts aussi bien que pour nostre seruice. Les
premiers Orateurs, & les premiers poëtes n'employèrent
les graces de leurs arts qu'en de pareilles rencontres, les
plus belles pieces de l'antiquité furent des oraisons, & des
cantiques funebres pour les heros qui auoient donné leur
sang à la patrie, & le paganisme ne faisoit point d'Apotheo-
ses que de ces grands personnages.

J'auois attendu iusqu'icy qu'une meilleure plume que la
mienne entreprit le Panegyrique de feu Monsieur de Clan-
leu, j'écoutois tous les iours si nos Colporteurs qui font re-
rentir les ruës de tant de pieces, ne crierioient point celle-là.
Mais enfin mon impatience a deuancé peut estre le dessein
de ceux qui s'y preparoient, & n'a pû souffrir plus long-
temps que sa vertu demeurast sans cette sorte de recom-
pense.

Encore que la Noblesse ne soit qu'un bien de la fortune,
& que par consequent elle ne merite pas tant de gloire, que
les biens de l'esprit, ny mesme que ceux du corps, toutes-
fois les Panegyristes ont accoustumé de commencer par el-
le les eloges des hommes extraordinaires.

En effet la Noblesse rehausse infiniment l'éclat des perfe-
ctions acquises ou naturelles, & le Gentil-homme a le mes-
me auantage sur le Roturier, qu'une pierre precieuse en-
chassée dans de l'or, sur celle qui n'est enchassée que dans
du plomb. Pour rendre donc à la memoire de nostre braue
Clanleu ce qui luy appartient, ie diray à ceux qui le peuuent
ignorer, que sa naissance n'estoit pas simplement noble,
mais qu'elle estoit illustre. Il estoit des plus hautes maisons
du Boulonois, dont mesme ses predecesseurs auoient eu le
gouvernement. Son pere auoit rendu de si glorieux seruices

au grand Henry IV. qu'il fut fait Mareſchal de Camp de
 ſes armées. Le ſils n'auoit pas degeneré. Ses belles quali-
 tez luy donnerent part aux bonnes graces de ſon A. R. au
 ſeruice de laquelle il ſ'eſtoit tellement attaché, qu'il auoit
 touſiours ſuiuy ſa fortune dans les affaires les plus épineu-
 ſes, & dans les conionctures les plus difficiles. Ce fut à ſa con-
 ſideration qu'il prit employ à Maſtric contre les Hollan-
 dois, où il commanda vn regiment de Cavalerie, & vn d'In-
 fanterie. Il accompagna à ſon retour en France ſon maiſtre
 qu'il auoit ſuiui à ſa fortie, mais l'empire que l'Abbé de la
 Riuiere ſ'eſtoit acquis ſur l'eſprit de S. A. R. luy fut inſup-
 portable, comme les gens de bien ne ſ'accordent iamais
 avec les perfides, il ſe retira d'auprès de ce cher Maiſtre, &
 ſa vaillance ne pouuant deuenir oyſiue, il prit vn regiment
 d'infanterie, qu'il commanda pour le ſeruice du Roy, tant
 au ſiege de la Mote, qu'en Flandres, & en Italie, où il don-
 na touſiours des preuues de ſa conduite, & de ſon courage.
 Comme il auoit touſiours marché ſur les pas de ſon pere, il
 paruint auſſi aux meſmes honneurs, & fut fait Mareſchal
 de Camp des armées du Roy, il merita en ſuite d'eſtre choi-
 ſi pour Gouverneur de Mardic, place dont tout le monde
 ſçait l'importance: mais la malice, & la trahiſon du Cardi-
 nal Mazarin furent cauſe qu'il y fit pluſtoſt voir les effets de
 ſon malheur, que de ſa vertu. Car ce Miniſtre ſi mal inten-
 tionné pour le bien de la France, laiſſa manquer cette pla-
 ce de tout ce qui eſtoit neceſſaire pour la garder. De ſorte
 que Monsieur de Clanleu ayant obtenu congé pour venir
 repreſenter à la Cour l'extremité ou elle eſtoit reduite, el-
 le fut aiſément liurée aux ennemis par l'intelligence d'un
 Caporal nommé la Pierre, qui auoit eſté laquay dudit Car-
 dinal, & qui rendit par cette trahiſon vn fidele ſeruice à ſon
 maiſtre, qui n'en recompenſe que ceux de cette nature.
 Comme la fortune en veut ordinairement aux Braues, par-
 ce qu'ils ne veulent pas releuer de ſon empire, ny deuoir
 leur gloire qu'à leur propre merite: cette malicieuſe Déeſſe
 iouïſſa encore vn mauuais tour au malheureux, & braue
 Clanleu: car ayant eſté fait encore gouverneur de Dixmu-

de, il perdit aussi cette place, en suite de quoy il fut fait prisonnier dans la Citadelle d'Amiens par le mesme Mazarin qui apprehendoit qu'il ne se iustificast, & ne reiettrast sur son mauuais ministere la perte de Dixmude. Enfin cet illustre persecuté trompa la fortune, lors qu'ayant connu la iustice de nostre party, il vint offrir à l'Auguste Senat de Paris ses biens & sa vie qu'il a si glorieusement sacrifiée pour le public. Il auoit perdu les places où il auoit commandé, mais il se resolut de garder Charanton, ou du moins de ne pas succumbre à sa perte. Pour fortifier vn village de si mauuaise garde, il apporta tous les soins imaginables, mais comme si l'huyver se fut entendu avec son mauuais destin, les gelées furent si rudes & si longues, qu'il ne peut auancer ses travaux comme il s'estoit proposé, il fut donc attaqué comme tout le monde sçait, par les troupes les plus considerables des ennemis, qui estoient en bataille pour empescher vn secours qu'il auoit raison d'attendre, & dont il n'eut pas eu besoin, si les autres postes eussent esté aussi bien deffendus que le sien. C'est là veritablement qu'il fit voir qu'il auoit accoustumé de perdre les places ou il commandoit, mais qu'il ne les perdoit pas par sa faute. Iamais homme ne se defendit mieux, & ne tua plus d'ennemis en si peu de temps; celuy-là mesme qui vouloit tenter son courage, & qui luy offroit quartier, sentit la pesanteur de ses derniers coups, & mourut en luy offrant vne vie qu'il estimoit honteuse. Si le Christianisme me permet de dire qu'il y a de nobles desespoirs, celuy de Monsieur de Clanleu est digne d'vn eternal souuenir, il pouuoit viure, mais il ne pouuoit pas garder Charanton, il estoit sage aussi bien que courageux, il sçauoit le iugement qu'eut fait le peuple, s'il eut surueu à la perte d'vne place attaquée par S. A. R. à qui il auoit esté, & quoy que ses playes qui estoient aussi grandes que son corps le peussent assez iustifier, il se rendit luy mesme vn iugement plus seuer que les autres. Il estoit François, il voulut mourir en France, & pour la France contre vn Sicilien, des Allemands, des polonois, il estoit homme de bien, il voulut mourir contre des voleurs, & des impies. Enfin il mourut

le braue Clanleu, mais il en cousta bon aux ennemis, nous pouuons dire qu'il nous seruit mieux en perdant cette place, que d'autres n'eussent fait en la conseruant, & l'affaire s'est passée de telle sorte, que nous auons suiet de souhaitter à nos ennemis de pareilles prises que celle du village de Charanton.

O braue Clanleu, genereux François, fidele seruiteur d'un Roy, qui n'est pas encore en estat de discerner le fidele d'avec le traistre, mais qui le fera vn iour, s'il plaist à Dieu, bon citoyen, amateur du bien public, quels eloges te puis-je donner qui soient proportionnez à ton merite? Nous scauons belle ame, que iouyssant des honneurs du ciel, tu méprises ceux de la terre, aussi n'est-ce pas tant pour ta satisfaction, que pour la nostre que nous celebrons tes loüanges, tu n'as que faire de rien en l'estat ou tu es, mais nous serions indignes de l'amour que tu nous a porté, si nous n'en gardions cherement le souuenir, & si nous épargnions l'ancrage pour la gloire d'un homme, qui a prodigué son sang pour nostre repos.

F I N.

